

摘藻堂四庫全書薈要

集部

欽定四庫全書薈要卷一萬七千八百二十三

集部

御定全唐詩卷四百十八

元稹

樂府古題序

丁酉

詩訖於周離騷訖於楚是後詩之流為二十四名
賦頌銘贊文誄箴詩行詠吟題怨歎章篇操引謠
謳歌曲詞調皆詩人六義之餘而作者之旨由操
而下八名皆起於郊祭軍賓吉凶苦樂之際在音

聲者因聲以度詞審調以節唱句度短長之數聲
韻平上之差莫不由之準度而又別其在琴瑟者
為操引采民此者為謳謠備曲度者總得謂之歌
曲詞調斯皆由樂以定詞非選調以配樂也由詩
而下九名皆屬事而作雖題號不同而悉謂之為
詩可也後之審樂者往往采取其詞度為歌曲蓋
選詞以配樂非由樂以定詞也而纂撰者由詩而
下十七名盡編為樂錄樂府等題除銑吹橫吹郊

祀清商等詞在樂志者其餘木蘭仲卿四愁七哀
之輩亦未必盡播於管弦明矣後之文人達樂者
少不復如是配別但遇興紀題往往兼以句讀短
長為歌詩之異劉補闕之樂府肇於漢魏按仲尼
學文王操伯牙作流波水仙等操齊犢沐作雉朝
飛衛女作思歸引則不於漢魏而後始亦以明矣
況自風雅至於樂流莫非諷興當時之事以貽後
代之人沿襲古題唱和重複於文或有短長於義

咸為贅賸尚不如寓意古題刺美見事猶有詩人
引古以諷之義焉曹劉沈鮑之徒時得如此亦復
稀少近代唯詩人杜甫悲陳陶哀江頭兵車麗人
等凡所歌行率皆即事名篇無復倚傍余少時與
友人樂天李公垂輩謂是為當遂不復擬賦古題
昨梁州見進士劉猛李餘各賦古樂府詩數十首
其中一二十章咸有新意余因選而和之其有雖
用古題全無古義者若出門行不言離別將進酒

特書列女之類是也其或頗同古義全創新詞者
則田家止述軍輸捉捕詞先螻蟻之類是也劉李
二子方將極意於斯文因為粗明古今歌詩同異
之音焉

夢上天

此後十首
並和劉猛

夢上高高天高高蒼蒼高不極下視五嶽塊
累累仰天依舊蒼蒼色躡雲聳身身更上攀天
上天攀未得西瞻若水一作木兔輪低東望蟠
桃海波黑日月之光不到此

非暗非明煙塞塞天悠地遠身跨風下無階梯上無力
來時畏有他人上截斷龍胡斬鵬翼茫茫漫漫方自悲
哭向青雲堆一作指素臆哭聲厭咽旁人惡喚起驚悲淚
飄露千慙萬謝喚厭人向使無君終不寤

冬白紵

一下有歌字

吳宮夜長宮漏款簾幕四垂燈燄煖西施自舞王自管
雪紵翻翻鶴翎散上聲促節牽繁舞腰嬾舞腰嬾王罷飲
蓋覆西施鳳花錦身作匡牀臂為枕朝珮縱玉一作王縱

晏寢寢一作酒醒閤報門無事子胥死後言為諱近王之

臣諭王意共笑越王窮惴惴夜夜抱冰寒不睡

將進酒

將進酒將進酒酒中有毒酖主父言之主父傷主母母

為妾地父妾天仰天俯地不忍言陽一作伴為僵踣主父

前主父不知加妾鞭旁人知妾為主說主將淚洗鞭頭

血推他雷推一作反推主母牽下堂扶妾遣升堂上牀將進

酒酒中無毒令主壽願主迴恩一作思歸主母遣妾如此

由一作事主父妾為此事人偶知自慙不密方自悲主今

顛倒安置妾貪天僭地誰不為

採珠行

海波無底珠沈海採珠之人判死採萬人判死一得珠
斛量買婢人一作天何在年年採珠珠避人今年採珠由

海神海神採珠珠盡死死盡明珠空海水珠為海物海
屬神神今自採何況人

董逃行

董逃董逃董卓逃搢鏗戈甲聲勞嘈剗剗深臍脂燄燄

人皆數

一無數字

歎曰爾獨不憶年年取我身上膏膏銷骨

盡煙火死長安城中賊毛起城門四走公卿士走勸劉

虞作天子劉虞不敢

一作取

作天子曹瞞篡亂從此始董

逃董逃人莫喜勝負相環

一作翻

相枕倚縫綴難成裁破

易何況曲鉞不能伸巧指欲學裁縫須準擬

憶遠曲

憶遠曲郎身不遠郎心遠沙隨郎飯俱在匙郎意看沙

那比飯水中書

一作畫

字無字痕君心暗畫誰會君況妾

事姑姑進止身去門前同萬里一家盡是郎腹心妾似
生來無兩耳妾身何足言聽妾私勸君君今夜夜醉何
處姑來伴妾自閉門嫁夫恨不早養兒將備老妾自嫁
郎身骨立老姑為郎求娶妾妾不忍見姑郎忍見為郎
忍耐看姑面

夫遠征

趙卒四十萬盡為坑中鬼趙王未信趙母言猶點新兵

更填死填死之兵兵氣索秦強趙破括敵起括雖專命
起尚輕何況牽肘之人牽不已坑中之鬼妻在營髻麻
戴經鵝雁鳴送夫之婦又行哭哭聲送死非送行夫遠
征遠征不必戍長城出門便不知死生

織婦詞

織夫

一作婦

何太忙蠶經三臥行欲老蠶神女聖早成絲

今年絲稅抽微早早徵非是官人惡去歲官家事戎索

征人戰苦東刀瘡

一作瘡

主將勲高換羅幕縹絲織帛猶

努力變緝

一作緝

掠機苦難織東家頭白雙女兒為解挑

紋嫁不得

余據荆時目擊貢綾戶有終老不嫁之女

檐前娟娟

一作裏裏

游絲上

上有蜘蛛巧來往羨他蟲豸解緣天能向虛空織羅網

田家詞

一作田家行

牛吒吒田确确旱塊敲牛蹄趵趵

剝音

種得官倉珠顆穀

六十年来兵簇簇

一作簇

月月食糧車轆轤一日官軍收

海服驅牛駕車食牛肉歸來攸

一作攸

得牛兩角重鑄鋤

一作銀

犂作斤劇姑舂婦擔去輸官輸官不足歸賣屋願

官早勝讎早覆農死有兒牛有犢誓一無不遣官軍糧

誓字

不足

俠客行

俠客不怕死怕在事不成事成不肯藏姓名我非竊賊
誰夜行白日堂堂殺袁盎九衢草草人面青此客此心
師海鯨海鯨露背橫滄溟海波分作兩處生海鯨分海
減海力俠客有謀人不識一作人三尺鐵蛇延二國

莫測

君莫非

此後九首
和李餘

鳥不解走獸不解飛兩不相解那得相譏犬不飲露蟬
不噉肥以蟬易犬蟬死犬飢燕在梁棟鼠在階基各自
窠窟人不能移一作不能改移婦好鍼縷夫讀書詩男翁女嫁
卒不相知懼聾摘耳效痛顰眉我不非爾爾無一作不我
非

田野狐兔行

野一作頭

種豆耘鋤種禾溝圳禾苗豆甲狐楮兔翦割鵠饑鷹烹
麟噉犬鷹怕兔毫犬被狐引狐兔相須鷹犬相盡

茲引反

日暗天寒禾稀豆損鷹犬就烹狐兔俱晒

當來日大難行

一無行字

當來日大難行前有阪後有坑大梁側小梁傾兩軸相
絞兩輪相撐大牛豎小牛橫烏啄牛背足趺力儻當來
日大難行太行雖險險可使平輪軸自撓牽制不停泥
潦漸久荆棘旋生行必不得不如不行

人道短

古道天道長人道短我道天道短人道長天道晝夜迴

轉不曾住春秋冬夏忙顛風暴雨電雷狂晴被陰暗月
奪日光往往星宿日亦堂堂天既職性命道德人自強
堯舜有聖德天不一作下能遣壽命永昌泥金刻玉與秦

始皇周公傳說何不長宰相老聃仲尼何事栖遑莽卓
恭顯皆數十年富貴梁冀夫婦車馬煌煌若此顛倒事
豈非天道短豈非人道長堯舜留得神聖事百代天子
有典章仲尼留得孝順語千年萬歲父子不敢相滅亡
歿後千餘載唐家天子封作文宣王老君留得五千字

子孫萬萬稱聖唐諡作玄元帝魂魄坐天堂周公周禮

二十一

作十二

卷有能行者知紀綱傳說說命三四紙有能

師者稱祖宗天能天人命人使道無窮若此神聖事誰

道人道短豈非人道長天能種百草猶得十年有氣息

薺纔一日芳人能揀得丁沈蘭蕙料理百和香天解養

禽獸餽虎豹豺狼人解和麴蘖充杓

一作禴

祀烝嘗杜鵑

無百作

一作年

天遣百鳥哺雛不遣哺鳳皇巨蟒壽千歲

天遣食牛吞象充腹腸蛟螭與變化鬼怪與隱藏蚊蚋

與利觔棘棘與鋒鋟賴得人道有揀別信任天道真茫
茫若此撩亂事豈非天道短賴得人道長

苦樂相倚曲

古來苦樂之相倚近於掌上之十指君心半夜猜恨生
荆棘滿懷天未明漢成一作皇眼瞥飛燕時可憐班女恩

已衰未有因由相浚絕猶得半年佯暖熱轉將深意諭
旁人緝綴瑕疵遣潛說一朝詔下辭金屋班姬自痛何

倉卒呼天撫

一作俯

地將自明不悟尋時暗

一作已

銷骨白

首宮

一作官

人前再拜願將日月相輝

一作揮

解苦樂相尋

晝夜間燈光那有

一作得

天明在主今被奪心應苦妾奪

深恩初為主欲知妾意恨主時主今為妾思量取班姬
收淚抱妾身我曾排擯無限人

出門行

兄弟同出門同行不同志悽悽分歧路各各營所為兄
上荆山巔翻石辨虹氣弟沈滄海底偷珠待龍睡出門
不數年同歸亦同遂俱用私所珍升沈自茲異獻珠龍

王宮值龍覓珠次但喜復得珠不求珠所自酬客雙龍

女授客六龍轡遣充行雨神雨澤隨客意雩夏

一作鐘

鼓繁縈秋

一作秋

玉帛積彩色畫廊廟奴僮被珠翠驥騄

千萬雙鴛鴦七十二言者未搖舌無人敢輕議其兄因

獻璞再則不履地門戶親戚疎匡牀妻妾棄銘心有所

待視足無所媿持璞自枕頭淚痕雙血漬一朝龍醒寤

本問偷珠事因知行雨偏妻子五刑備仁兄捧尸哭勢

友掉頭諱喪車黔首葬弔客青蠅至楚有望氣人王前

忽長跪賀王得貴寶不遠王所蒞求之果如言剖出浮
筠膩白珩無顏色垂棘有瑕累在楚裂地封入趙連城
貴秦遣李斯書書為傳國瑞秦亡漢魏傳傳者得神器
卞和名永永與寶不相墜勸爾出門行行難莫行易易
得還易失難同亦難離善賈識貪廉良田無殖穉磨劒
莫磨錐磨錐成小利

捉捕歌

捉捕復捉捕莫捉狐與兔兔藏窟穴豺狼妨道路道

路非不妨最憂螻蟻聚豺狼不陷穿螻蟻潛幽壺切切
主人窗主人輕細故延緣蝕櫟櫨漸入棟梁柱梁棟盡
空虛攻穿痕不露主人坦然意晝夜安寢寤網羅布參
差鷹犬走回互盡力窮窟穴無心自還顧客來歌捉捕
歌竟淚如雨豈是惜狐兔畏君先後誤願君埽梁棟莫
遣螻蟻附次及清道塗盡滅豺狼步主人堂上坐行客
門前度然後巡野田徧張畋獵具外無梟獍援內有熊
羆驅狡兔掘荒榛妖狐熏古墓用力不足多得禽自無

數畏君聽未詳聽客有明喻蟣蟲誰不輕鯨鯢誰不惡
在海尚幽遐在懷交穢污歌此勸主人主人那不悟不
悟還更歌一作多誰能恐違忤

古築城曲五解

年年塞下丁長作出塞兵自從冒頓強官築遮虜城
築城須努力城高遮得賊但恐賊路多有城遮不得
丁口傳父言莫問城堅不音平城被虜圍漢斷城牆走
因茲請休和虜往騎來過半疑兼半信築城猶嵯峨

築城安敢煩願聽丁一言請築鴻臚寺兼愁虜出關

估客樂

估客無住著

一作者

有利身則

一作即

行出門求火伴入戶

辭父兄父兄相教示求利莫求名求名有

一作莫

所避求

利無不營火伴相勒縛賣假莫賣誠交關但

一作少

交假

本生

上聲得失輕

一作交假本生輕

自茲相將去誓死意不更亦

一作一

解市頭語便無鄰里情鋤石打臂釧糯米吹項璎

歸來邨中賣敲作金石聲邨中田舍娘貴賤不敢爭所

費百錢

一作必

本已得十倍贏顏色轉光淨飲食亦甘馨

子本頻蕃息貨販

一作略

日兼并求珠駕滄海採玉上荆

衡北買党項馬西擒吐蕃鸚炎洲布火浣蜀地錦織成

越婢脂肉滑奚僮眉眼明通算衣食費不計遠近程經

遊

一作營

天下徧却到長安城城中東西市聞客次第迎

迎客兼說客多財為勢傾客心本明黠聞語心已驚先

問十常侍次求百公卿侯家與主第點綴無不精歸來

始安坐富與王者

一作家

勅市卒酒

一作醉

肉臭縣胥家舍

成豈唯絕言語奔走極使令大兒販材木巧識梁棟形
小兒販鹽鹵不入州縣征一身偃市利突若截海鯨鉤
距不敢下下則牙齒橫生為估客樂判爾樂一生爾又
生兩子錢刀何歲平

御定全唐詩卷四百十八

欽定四庫全書薈要卷一萬七千八百二十四

集部

御定全唐詩卷四百十九

元稹

連昌宮詞

連昌宮中滿宮竹歲久無人森似一作自束又有牆頭千

葉桃風動落花紅蔌蔌宮邊老翁為余泣小年進食曾

因入一作小年選
進因曾入

上皇正在望仙樓太真同凭闌干立

樓上樓前盡珠翠炫轉熒煌照天地歸來如夢復如癡

何暇備言宮裏事初過寒食一百六店舍無煙宮樹綠

夜半月高弦索鳴賀老琵琶定

一作檀

場屋力士傳呼覓

念奴念奴潛伴諸郎宿須臾覓得又連催特敕街中許

然燭春嬌滿眼睡

一作眠

紅綃掠削雲鬟旋裝束飛上九天

歌一聲二十五郎吹管逐逡巡大徧涼州徹色色龜茲

轟錄續李暮摩笛傍宮牆偷得新翻數般曲

念奴天寶中名倡善

歌每歲樓下酺宴累日之後萬衆喧臨嚴安之韋黃裳輩闢易不能禁衆樂為之罷奏明皇遣高力士大呼於樓上曰欲遣念奴唱歌邠二十五郎吹小管鬪看人能聽否未嘗不悄然奉詔其為當時所重也如此然而明

皇不欲奪使遊之盛未嘗置在宮禁或歲幸湯泉時巡東洛有司潛遣從行而已又明皇嘗於上陽宮夜從按新翻一曲屬明夕正月十五日潛遊燈下忽聞酒樓上有笛奏前夕新曲大駭之明日密遣捕捉笛者詰驗之自云其夕竊於天津橋玩月聞宮中度曲遂於橋柱上挿譜記之臣即長安少年善笛者李暮也明皇異而遣之

平明大駕發行宮萬人歌舞塗路

一作在途

中百官隊仗

避岐薛

岐王範薛王業明皇之弟

楊氏諸姨

貴妃三姊帝呼為姨封韓虢秦國三夫人

車

鬪風明年十月東都破

天寶十三年祿山破洛陽

御路猶

一作獨

存祿

山過驅令供頓不敢藏萬姓無聲

一作言

淚潛墮兩京定

後六七年却尋家舍行宮前莊園燒盡有枯井行宮門

閉

一作閨

樹宛然爾後相傳六皇帝

肅代德順憲穆

不到離宮門

久閉往來年少說長安玄武樓成

一作前

花萼廢去年敕

使因

一作去年因敕使

斫竹偶值門開暫相逐荆榛櫛比塞池

塘狐兔驕癡緣樹木舞榭敍傾基

一作臺

尚在

一作存

文窗

窈窕紗猶綠塵埋粉壁舊花鈿烏

一作鳥

啄風箏碎珠玉

上皇偏愛臨砌花依然御榻臨階斜蛇出燕巢盤鬪棋

茵生香案正當衙寢殿相連端正樓太真梳洗樓上頭

晨光未出簾影黑

一作動

至今反挂珊瑚鉤指似

一作傍向

人因慟哭却出

一作立

宮門淚相續自從此後還閉門夜

夜狐狸上門屋我聞此語心骨悲太平誰致亂者誰翁

言野父何分別耳聞眼見為君說姚崇宋璟作相公勸

諫上皇言語切燮理陰陽永泰豐調和中外無兵戎長

官清平太守好揀選皆言由相

一作至

公開元之末姚宋

死朝廷漸漸由妃子祿山宮裏養作

一作為

兒虢國門前

鬧如市弄權宰相不記名依稀憶得

一作憶得依稀

楊與李廟

謨

一作謀

顛倒四海搖五十年来作瘡痂令皇神聖丞相

明詔書纔下吳蜀平官軍又取淮西賊此賊亦除天下
寧年年耕種宮前道今年不遣子孫耕老翁此意深望

幸努力廟謀

一作謨

休用兵

望雲騅馬歌

并序

德宗皇帝以八馬幸蜀七馬道斃唯望雲騅來往
不頓貞元中老死天廐臣稹作歌以記之

憶昔先皇幸蜀時八馬入谷七馬疲肉綻筋攣四蹄脫
七馬死盡無馬騎天子蒙塵天雨泣巉岵道路淋漓濕

崢嶸白草眇難期
認洞黃泉安可入

白草認洞並雄谷
中地名古諺云認

洞入
黃泉

朱泚圍兵抽未盡
懷光寇騎追行及

興元元年二月
李懷光反

嬪娥相顧倚樹啼
鵲鷺無聲仰天立
圉人初進望雲騅
彩色顚顚衆馬欺
上前噴吼如有意
耳尖卓立節踟奇

君王試遣迴胸臆
撮骨鋸牙駢兩肋
蹄懸四踞

一作踞
一作矩

腦

一作腰

顓方勝聳三山尾
株

一作扶

直圍人畏誚仍相惑

此馬無良空有力
頻頻嚙掣轡難施
往往跳趨鞍

一作騎

不得色沮聲悲仰天訴
天不遣言君未識
亞身受取白

玉羈

一作鞍

開口銜將紫金勒君王自此方散騎似遇良

臣久悽惻龍騰魚鼈倬然驚

一作威震驚

驥盼

一作盼

驢騾少

顏色七聖心迷運方厄五丁力盡路猶窄索它

一作山

上斧刃堆望秦嶺下錐頭石五六百里真符縣八十四

盤青山驛掣開流電有輝光突過浮雲無朕跡地平險

一作隘

盡施黃屋九九屬車十二燾齊映前導引驢頭嚴

震迎號抱騅足路傍垂白天寶民望騅禮拜見騅哭皆

言

一作云

玄宗當時無此馬不免騎騾來幸蜀雄雄猛將

李令公收城殺賊豺狼空天旋地轉日再中天子却坐

明光宮朝廷無事忘征戰校獵朝迴暮毬宴御馬齊登

擬用槽

底中號乘輿之馬曰擬用槽

君王自試宣徽殿圉人還進望

雲雕性強步濶無方便分駿擺杖

一作袂

頭太高擘肘迴

頭

一作顙

項難轉人人共惡難迴跋潛遣飛龍減芻秣銀

金

一作

鞍繡韉不復施空盡

茲引反

天年御槽活當時鄒

或作

鄒

諺已有言

一作云

莫倚功高

一作能

浪開濶登山縱似望

雲雕平地須饒紅叱撥長安三月花垂草果下翩翩紫

騶好千官煖熱李令閒百馬生獐望雲老望雲騅爾之

種類世世奇當時項王乘爾祖分配英豪

一作雄

稱霸王

爾身今日逢聖人從幸已渝歸入秦功成事遂身退天
之道何必隨羣逐隊到死蹋紅塵望雲騅用與不用各
有時爾勿悲

和李校書新題樂府十二首

并序

余友李公垂貺余樂府新題二十首雅有所謂不
虛為文余取其病時之尤急者列而和之蓋十二

而已昔三代之盛也士議而庶人謗又曰世理則
詞直世忌則詞隱余遭理世而君盛聖故直其詞
以示後使夫後之人謂今日為不忌之時焉

上陽白髮人

天寶年中花鳥使

天寶中密號采取
豔異者為花鳥使

撩花狎鳥含春思

滿懷墨詔求嬪御走上高樓半酣醉醉酣直入卿士家

閨闈不得偷迴避良人顧妾

一作望

心死別小女呼爺血

垂淚十中有一得

一作一
得頽

更衣永

一作九

配深宮作宮婢

御馬南奔胡馬蹙宮女三千合宮棄宮門一閉不復開

上陽花草青苔地月夜閒聞洛水聲秋池暗度風荷氣

日日長看提衆

一作象

門終身不見門前事近年又送數

人來自言興慶南宮至我悲此曲將徹骨更想深冤復

酸鼻此輩賤嬪何足言帝子天孫古稱貴諸王在閣四

十年七宅六宮門戶悶隋煬枝條襲封邑

近古封前代子孫為二王

三肅宗血胤無官位

肅宗已後諸王並未出閣

王無妃媵主無壻

一作

夫陽亢陰淫結災累何如決壅順衆流女遣從夫男作

吏

華原磬

李傳云天寶中始廢
泗濱磬用華原石

泗濱浮石裁為磬古樂疎音少人聽
工師小賤牙曠稀不辨邪聲嫌雅正
正聲不屈古調高鍾律參差管絃病
鏗金戛瑟徒相雜投玉敲冰杳然零

一作震

華原輶石易

追琢高下隨人無雅鄭棄舊美新由
樂胥自此黃鍾不能競玄宗愛樂愛
新樂梨園弟子承恩橫霓裳纔徹胡
騎來雲門未得蒙親定我藏古磬藏
在心有時激作南

風詠伯夔曾撫野獸馴仲尼暫叩一作和春雷盛何時得
向筇簾懸為君一吼君心醒願君每聽念封疆不遣豺
狼勦人命

五弦彈

趙璧五弦彈徵調徵聲巉絕何清峭辭一作避雄皓鶴警

露啼失子哀猿繞林嘯風入春松正凌亂鶯含曉舌憐
嬌妙嗚嗚暗溜咽冰泉殺殺霜刀澀寒鞘促節頻催漸
繁撥珠幢斗絕金鈴掉千穀鳴鏑發胡弓萬片清球擊

虞廟衆樂雖同第一部德宗皇帝常偏召旬休節假暫
歸來一聲狂殺長安少主第侯家最難見按歌按曲

一作

按歌
接曲

皆承詔水精簾外教貴嬪璚筵心伴中要臣有

五賢非此弦或在拘囚或屠釣一賢得進勝累百兩賢
得進同周召三賢事漢滅暴彊四賢鎮岳寧邊徼五賢
竝用調五常五常旣叙三光耀趙璧五弦非此賢九
何勞設庭燎

西涼伎

吾聞昔日西涼州人煙撲地桑柘稠蒲萄酒熟恣行樂

紅豔青旗朱粉樓樓下當壚稱卓女樓頭伴客名莫愁

鄉人不識離別苦更卒多為沈滯遊哥舒開府設高宴

八珍九醞當前頭前頭百戲競撩亂九劔跳躑霜雪浮

獅子搖光毛彩豎胡騰一作姬醉舞筋骨柔大宛來獻赤

汗馬贊普亦奉翠茸裘一朝燕賊亂中國河湟沒一作急

盡空遺丘開遠門前萬里堠今來感到行原州平時開遠門外

立堠云去安西九千九百里以示
我人不為萬里行其就盈故矣
去京五百而近何其

逼天子縣內半沒為荒陬西涼之道爾阻脩連城邊將
但高會每聽此曲能不羞

法曲

吾聞黃帝鼓清角弭伏熊羆舞玄鶴舜持干羽苗草心
堯用咸池鳳巢閣大夏獲武皆象功功多已訝玄功薄
漢祖過沛亦有歌秦王破陣非無作作之宗廟見艱難
作之軍旅傳糟粕明皇度曲多新態宛轉侵淫一作搖易

沈著赤白桃李取花名霓裳羽衣號天落雅弄雖云已

變亂夷音未得相參錯自從胡騎起煙塵毛毳腥羶滿
咸洛女為胡婦學胡妝伎進胡音務胡樂洛音火鳳聲沈
多咽絕春鶯嚙罷長蕭索胡音胡騎與胡妝五十年来
競紛泊

馴犀

李傳云貞元丙子歲南海來貢
至十三年冬苦寒死於苑中

建中之初放馴象遠歸林邑近交廣獸返深山鳥構巢
鷹鷂鷄鶻無羈鞅貞元之歲貢馴犀上林置圉官司養
玉盆金棧非不珍虎噉狴牢魚食網渡江之橘踰汶貉

反時易性安能長臘月北風霜雪深蹉跎鱗身遂長往
行地無疆費傳驛通天異物罹幽枉乃知養獸如養人
不必人人自敦獎不擾則得之於理不奪有以多於賞
脫衣推食衣食之不若男耕女令紡堯民不自知有堯
但見安閒聊擊壤前觀馴象後馴一作觀犀理國其如指
諸掌

立部伎

李傳云太常選坐部伎無性識者退入立部伎又選立部伎無性識者退入雅

樂部則雅樂可知矣
李君作歌以諷焉

胡部新聲錦筵坐中庭漢振高音播太宗廟樂傳子孫
取類羣兇陣初破戢戢攢槍霜雪耀騰騰擊鼓雲

一作風

雷磨初疑遇敵身啓行終象由文士憲左昔日高宗常

立聽曲終然後臨玉座如今節將一掉頭電卷風收盡

摧挫宋晉鄭女歌聲發滿堂會客齊喧歌

一作和

珊珊珮

玉動腰身一一貫珠隨咳唾頃向園丘見郊祀亦曾正
旦親朝賀太常雅樂備宮懸九奏未終百寮情憊滯難
令季札辨遲迴但恐文侯臥工師盡取聲昧人豈是先

王作之過宋沈嘗傳天寶季法曲胡音忽相和明年十

月燕寇來九廟千門虜塵浣

太常丞宋沈傳漢中王舊說云明皇雖雅好度曲然

而未嘗使蕃漢雜奏天寶十三載始詔道調法曲與胡部新聲合作識者異之明年祿山叛

我聞此

語歎復泣古來邪正將誰奈奸聲入耳佞入心侏儒飽飯夷齊餓

驃國樂

李傳云貞元辛巳歲始來獻

驃之樂器頭象駝音聲不合十二和促舞跳趨筋節硬繁辭變亂名字訛千彈萬唱皆咽咽左旋右轉空嗟嗟

俯地呼天終不會曲成調變當如何德宗深意在柔遠

笙鏞不御停嬌

一作嬾

娥史館書為朝貢傳太常編入鞞

鞞科古時陶堯作天子遜遁親聽康衢歌又遣道人持
木鐸徧采謳謠天下過萬人有意皆洞達四岳不敢施
煩苛盡令區中擊壤塊燕及海外覃恩波秦霸周衰古
官廢下堙上塞王道頗共矜異俗同聲教不念齊民方
薦瘥傳稱魚鼈亦咸若苟能效此誠足多借如牛馬未
蒙澤豈在抱甕滋鼃鼃教化從來有源委必將泳海先

泳河是非倒置自古有驃兮驃兮誰爾訶

胡旋女

李傳云天寶中西國來獻

天寶欲末胡欲亂胡人獻女能胡旋旋得明王不覺迷
妖胡奄到長生殿胡旋之義世莫知胡旋之容我能傳
蓬斷霜根羊角疾竿戴朱盤火輪炫驪珠迸珥逐飛一作

龍

星虹

降音

暈輕巾掣流電潛鯨暗噏笄

殘謝反

波海

一作海波

回風亂舞當空霰萬過其誰辨終始四座安能分背面
才人觀者相為言承奉君恩在園變是非好惡隨君口

南北東西遂君眄柔輓依身著

一作看

佩帶襄回繞指同

環釧佞臣聞此心計回熒惑

一作惑亂

君心君眼眩君言似

曲屈為

一作如

鉤君言好直舒為箭巧隨清影觸處行妙

一作好

學春鶯百般轉傾天側地用君力抑塞周遮恐君

見翠華南幸萬里橋玄宗始悟坤維轉

緯書曰僧一行嘗奏明皇曰陛

下行幸萬里聖祚無疆故天寶中歲幸洛陽冀充盈數及上幸蜀至萬里橋乃歎謂左右曰一行之奏其是乎

寄言旋目與旋心有國有家當共謹

蠻子朝

李傳云貞元末蜀川始通蠻國

西南六詔有遺種，僻此荒陬路尋壅。
部落支離君長賤，比諸夷狄為幽冗。
犬戎彊盛頻侵削，降有憤心戰無勇。
夜防抄盜保深山，朝望煙塵上高冢。
鳥道繩橋來款附，非因慕化因危一作為。
悚清平官繫一作擊，金呿嗟求天叩。

地持雙珙

一作拱

益州大將韋令公，項實遭時定汧隴。
自

居劇鎮無他績，幸得蠻來固恩寵。
為蠻開道引蠻朝，迎

一作接

蠻送蠻常繼踵，天子臨軒四方賀。
朝廷無事唯端

拱，漏天走馬春。雨寒瀘水飛蛇瘴，
煙重椎頭醜。類除憂

患瘡足役夫勞洶湧匈奴互市歲不供雲蠻通好轡長
駮戎王養馬漸多年南人耗賴西人恐

縛戎人

近制西邊每擒蕃囚例皆傳置南方不加勦戮故李公作歌以諷焉

邊頭大將差健卒入抄禽生悞於鶻但逢賴面即捉來
半是邊人半戎羯大將論功重多級捷書飛奏何超忽
聖朝不殺諧至仁遠送炎方示微一作懲罰萬里虛勞肉

食費連頭盡被氈裘喝華裯重席臥腥臊病犬愁鵠聲

咽嗚中有一人能漢語自言家本長城

一作安窟少一作小

年隨父戍安西河渭瓜沙眼看沒天寶未亂猶

一作數前

載狼星四角光蓬勃中原禍作邊防危果有豺狼四來
伐蕃馬臚成正翹健蕃兵肉飽爭唐突煙塵亂起無亭
燧主帥驚跳棄旄鉞半夜城摧鵠雁鳴妻啼子叫曾不
歇陰森神廟未敢依脆薄河冰安可越荊棘深處共潛
身前困蒺藜後艱晚平明蕃騎四面走古墓深林盡株
櫟少壯為俘頭被髡老翁留居足多刖烏鳶滿野尸狼
藉樓榭成灰牆突兀暗水濺濺入舊池平沙漫漫鋪明

月戎王遣將來安慰口不敢言心咄咄供進腋腋御叱
般豈料穹廬揀肥腩五六十年消息絕中間盟會又猖

獫眼穿東日望堯雲腸斷正朝梳漢髮

延州鎮李如暹
蓬子將軍之子

也嘗沒西蕃及歸自云蕃法惟正歲一日許唐人沒蕃
者服衣冠如暹當此日悲不自勝遂與蕃妻密定歸計

近年如此思漢者半為老病半埋骨常

一作向

教孫子學

鄉音猶話平時好城闕老者儻盡少者壯生長蕃中似
蕃悖不知祖父皆漢民便恐為蕃心矻矻緣邊飽餒十
萬衆何不齊驅一時發年年但捉兩三人精衛銜蘆塞

溟渤

陰山道

李傳云元和二年有詔悉以金銀酬回紇馬價

年年買馬陰山道馬死陰山帛空耗元和天子念女工
內出金銀代酬犒臣有一言昧死進死生甘分荅恩燾
費財為馬不獨生耗帛傷工有他盜臣聞平時七十萬
匹馬關中不省聞嘶噪四十八監選龍媒時貢天庭付
良造如今垆野十無一盡在飛龍相踐暴萬束芻茭供
旦莫千鍾菽粟長牽漕屯軍郡國百餘鎮縑緗歲奉春

冬勞稅戶逋逃例攤配官司折納仍貪冒挑紋變緝力
倍費棄舊從新人所好越穀繚綾織一端十匹素縑功
未到豪家富賈踰常制令族清一作親班無雅操從騎愛
奴絲布衫臂鷹小兒雲錦韜羣臣利已要差僭天子深
衷空憫悼綽立花塼鸞鳳行雨露恩波幾時報


御定全唐詩卷四百十九

謹案卷四百十五第四頁後五行遣君何處遣人
求按上遣字訛

卷四百十六第五頁前三行黃草峽聽柰之琴二
首按長慶集題下有柰之公繼室裴夫人也注
卷四百十八第七頁前六行海鯨分海減海力刊
本脫海鯨二字據原集增

第七頁前七行俠客有謀人不識刊本識下行測
字據原集刪





總校官庶吉士臣張能照

校對官庶吉士臣何思鈞

校對官檢討臣郭寅

謄錄監生臣許祖懷

謄錄監生臣馬嗣全

欽定四庫全書薈要

集部

御定全唐詩卷四百

二十至
二十三

欽定四庫全書薈要卷一萬七千八百二十五

集部

御定全唐詩卷四百二十

元稹

有鳥二十章

庚寅



有鳥有鳥名老鴟鴞張貪很老不衰似鷹指爪唯攫肉
戾天羽翮徒翰飛朝偷暮竊恣昏飽後顧前瞻高樹枝
珠丸彈射死不去意在護巢兼護兒

有鳥有鳥毛似鶴行步雖遲性靈惡主人但見閒慢容

許占蓬萊最高閣弱羽長憂俊鵲拳疽腸暗著

一作鵲把

雛啄千年不死伴靈龜臬心鶴貌何人覺

有鳥有鳥如鸛雀食蛇抱磬天姿惡行經水許為毒流
羽拂酒杯為死藥漢后忍渴天豈知驪姬墳地君寧覺
嗚呼為有白色毛亦得乘軒謬稱鶴

有鳥有鳥名為鵠毛衣輭毳心性柔鵠緣暖足憐不喫
鷄為同科曾共游飛飛漸上高高閣百鳥不猜稱好速
佳人許伴鵠雛食望爾化為張氏鈞

有鳥有鳥名野雞天姿耿介行步齊主人偏養憐整頓
玉粟充腸瑤樹栖池塘潛狎不鳴雁津梁暗引無用鷄
秋鷹迸逐霜鶻遠鵬鳥護巢當晝啼主人頻問遣妖術
力盡計窮音響悽當時何不早量分莫遣輝光深照泥
有鳥有鳥羣翠碧毛羽短長心竝窄皆曾偷食淥池魚
前去後來更逼迫食魚滿腹各自飛池上見人長似客
飛飛競占嘉樹林百鳥不爭緣鳳惜

有鳥有鳥羣紙鳶因風假勢童子牽去地漸高人眼亂

世人為爾羽毛全風吹繩斷童子走餘勢尚存猶在天
愁爾一朝還到地落在深泥誰復憐

有鳥有鳥名啄木木中求食常不足偏啄鄧林求一蟲
蟲孔未穿長皆禿木皮已穴蟲在心蟲蝕木心根祗覆
可憐樹上百鳥兒有時飛向新林宿

有鳥有鳥衆蝙蝠長伴佳人占華屋妖鼠多年羽翮生
不辨雌雄無本族穿墉伺隙善潛身晝伏宵飛惡明燭
大廈雖存柱石傾暗齧棟梁成蠹木

有鳥有鳥名為鴉深藏孔穴難動搖鷹鷂繞樹探不得
隨珠彈盡聲轉嬌主人煩惑罷擒取許占神林為物妖
當時幸有燎原火何不鼓風連夜燒

有鳥有鳥名燕子口中未省無泥滓春風吹送廊廡間
秋社驅將嵌孔裏雷驚雨灑一時蘇雲一作雪壓霜摧半
年死驅去驅來長信風暫託棟梁何用喜

有鳥有鳥名老烏貪癡突諄天下無田中攫肉吞不足
偏入諸巢探衆雛歸來仍占主人樹腹飽巢高聲響麤

山鵝野鵲閒受肉鳳皇不得聞罪辜秋鷹掣斷架上索
利爪一揮毛血落可憐鵝鵲慕腥羶猶向巢邊競紛泊
有鳥有鳥謂白鵝雪毛皓白紅觜殷貴人妾婦愛光彩
行提坐臂怡朱顏妖姬謝寵辭金屋雕籠又伴新人宿
無心為主擬銜花空長白毛映紅肉

有鳥有鳥羣雀兒中庭啄粟籬上飛秋鷹欺小嫌不食
鳳皇容衆從爾隨大鵬忽起遮白日餘風簸蕩山岳移
翩翹百萬徒驚噪扶搖勢遠何由知古來妄說銜花報

縱解銜花何所為可惜官倉無限粟伯夷餓死黃口

一作

鳥肥

有鳥有鳥皆百舌舌端百囀聲咄啞先春盡學百鳥啼
真偽不分聽者悅伶倫鳳律亂宮商盤木天雞誤時節
朝朝暮暮主人耳桃李無言管弦咽五月炎光朱火盛
陽燄燒陰幽響絕安知不是卷舌星化作剛刀一時截
有鳥有鳥毛羽黃雄者為鴛雌者鴛主人并養七十二
羅列雕籠開洞房雄鳴一聲雌鼓翼夜不得栖朝不食

氣息榻然雙翅垂猶入籠中就顏色

有鳥有鳥名鷦鷯鈴子眼睛蒼錦襦貴人腕軟憐易臂
奮肘一揮前後呼俊鷗無由拳狡兔金雕不得擒魅狐
文王長在苑中獵何日非熊休賣屠

有鳥有鳥名鸚鵡養在雕籠解人語主人曾問私所聞
因說妖姬暗欺主主人方惑翻見疑趁歸隴底雙翅垂
山鷓野雀怪鸚語競噪爭窺無已時君不見隋朝隴頭
姥嬌養雙鸚囑新婦一鸚曾說婦無儀悍婦殺鸚欺主

母一鸚閉口不復言母問不言何太久鸚言悍婦殺鸚

由母為逐之鄉里醜當時主母信

一作聽

爾言顧爾微禽

命何有今之主人翻爾疑何事籠中漫開口

有鳥有鳥名俊鸚鵡

一作雞

小鸚癡俊無匹雛鸚拂爪血

迸天狡兔中拳頭粉骨平明度海朝未食拔

一作挾

上秋

空雲影沒瞥然飛下人不知攪碎荒城魅狐窟

有鳥有鳥真白鶴飛上九霄雲漠漠司晨守夜悲雞犬

啄腐吞腥笑鸚鵡堯年值雪度關山晉室聞琴下寥廓

遼東盡爾千歲人
悵望橋邊舊城郭

有酒十章

有酒有酒雞初鳴
夜長睡足神慮清
悄然危坐心不平
浩思一氣初彭亨
頡頏洞浩汗真無名
胡不終渾成胡為
沈濁以升清
蠢然分畫高下程
天茲地鬱羣動萌
毛鱗鰥介如鬚鬣
嗚呼萬物紛已生
我可奈何兮杯一傾
有酒有酒東方明
一杯既進吞元精
尚思天地之始名
一元既二分濁清
地居方直天體明
胡不八荒訂訂如

砥平胡山高屹崕海泓澄胡不日車杲杲晝夜行胡為
月輪滅鉞星暉眈嗚呼不得真宰情我可奈何兮杯再
傾

有酒有酒兮湛淥波飲將愉兮氣彌和念萬古之紛羅
我獨慨然而浩歌歌曰天耶地耶肇萬物耶儲胥大庭
之君耶恍耶忽耶有耶傳而信耶久而謬耶文字生而
義農作耶仁義別而聖賢出耶炎始暴耶蚩尤熾耶軒
轅戰耶不得已耶仁耶聖耶愍人之毒耶天蕩蕩耶堯

穆穆耶豈其讓耶歸有德耶舜其貪耶德能嗣耶豈其
讓耶授有功耶禹功大耶人戴之耶益不逮耶啓能德
耶家天下耶桀後嗣耶於後嗣之桀則可耶於天下之
桀其可耶嗚呼遠堯舜之日耶何棄舜之速耶辛癸虐
耶湯武草耶順天意耶公天下耶踵夏桀嗣私其公耶
竝建萬國均其私耶專征遞伐闢海內耶秦掃其類威
定之耶二代而隕守不仁耶漢魏而降乘其機耶短長
理亂繫其術耶堯耶舜耶終不可逮耶將德之者不位

位者不逮其德耶時耶時其可耶我可奈何兮一
杯又進歌且歌

有酒有酒兮黯兮冥仰天大呼兮天漫漫兮高兮青高
兮漫兮吾孰知天否與靈取人之仰者無乃在乎昭昭
乎曰與夫日星何三光之竝照兮奄雲雨之冥冥幽妖
倏忽兮水怪族形鼃鼃岸走兮海若鬪鯨河潰潰兮愈
濁濟翻翻兮不寧蛇噴雲而出穴虎嘯風兮屢鳴汙高
巢而鳳去兮溺厚地而芝蘭以之不生葵心傾兮何向

松影直而孰明人懼愁兮戴榮天寂默兮無聲嗚呼天
在雲之上兮人在雲之下兮又安能決雲而上征嗚呼
既上征之不可兮我奈何兮杯復傾

有酒有酒香滿尊君寧不飲開君顏豈不知君飲此心
恨君今獨醒誰與言君寧不見颶風翻海火燎原巨鼇
唐突高燄延精衛銜蘆塞海溢枯魚噴沫救池燔筋疲
力竭波更大鰭焦甲裂身已乾有翼勸爾升九天有鱗
勸爾登龍門九天下視日月轉龍門上激雷雨奔蟾蜍

雖怒誰爾懼
鵑旦雖啼誰爾憐
博空意遠風來壯
我可奈何兮一杯又進消我煩

有酒有酒歌且哀
江春例早多早梅櫻桃桃李相續開
間以木蘭之秀香
裏回東風吹盡南風來鶯聲漸澀花
摧墮四月清和豔殘卉芍藥翻紅蒲映水
夏龍痛毒雷雨多蒲葉離披豔紅死
紅豔猶存榴樹花紫苞欲綻高
筍牙筍牙成竹冒霜雪榴花落地還銷歇
萬古盈虧相逐行君看夜夜當窗月
榮落虧盈可奈何生成未徧霜

霰過霜霰過兮復

一作無

奈何靈芝負絕荆棘多

兮可奈何可奈何兮終奈何秦皇堯舜俱腐骨我可

何兮又進一杯歌復歌

有酒有酒方爛漫飲酣拔劍心眼亂聲若雷砰目流電
醉舞翻環身眩轉乾綱倒軋坤維旋白日橫空星宿見
一夫心醉萬物變何況蚩尤之蹴蹋安得不以熊羆戰
嗚呼風后力牧得親見我可奈何兮又進一杯除健羨
有酒有酒兮告臨江風漫漫兮波長渺渺兮注海海蒼

蒼兮路茫茫彼萬流之混入兮又安能分若畎澮淮河
與夫岷吳之巨江味作鹹而若一雖甘淡兮誰謂爾為
良濟涓涓而縷貫將奈何兮萬里之渾黃鯨歸穴兮渤
溢鼇載山兮低昂陰火然兮衆族沸渭颶風作兮晝夜
猖狂顧千珍與萬怪兮皆委潤而深藏信天地之瀦蓄
兮我可奈何兮一杯又進兮包大荒

有酒有酒兮日將落餘光委照在林薄陽烏撩亂兮屋
上栖陰怪跳趯兮水中躍月爭光兮星又繁燒橫空兮

燄仍爍我可奈何兮時既昏一杯又進兮聊處廓

有酒有酒兮再祝祝予心兮何欲欲天泰而地寧欲人
康而歲熟欲鳳翥而鵷隨兮欲龍亨而驥逐欲日盛而
星微兮欲滋蘭而殲毒欲人欲而天從苟天未從兮我
可奈何兮一杯又進聊自足

華之巫

景戌

有一人兮神之側廟森森兮神默默神默默兮可奈何
願一見神兮何可得女巫索我何所有神之開閉予之

手我能進若神之前神不自言寄予口爾欲見神安爾
身買我神錢沽我酒我家又有神之盤爾進此盤神爾
安此盤不進行路難陸有摧車舟有瀾我聞此語長太
息豈有神明欺正直爾居大道誰南北恣矯神言假神
力假神力兮神未悟行道之人不得度我欲見神誅爾
巫豈是因巫假神祐爾巫爾巫爾獨不聞乎與其媚於
奧不若媚於竈使我傾心事爾巫吾寧驅車守吾道爾
巫爾巫且相保吾心自有丘之禱

廟之神

我馬煩兮釋我車神之廟兮山之阿予一拜而一祝祝
予心之無涯涕沆瀾而零落神寂默而無譁神兮神兮
奈神之寂默而不言何復再拜而再祝鼓吾腹兮歌吾
歌歌曰今耶古耶有耶無耶福不自神耶神不福人耶
巫爾惑耶稔而誅耶謁不得耶終不可謁耶返吾駕而
遵吾道廟之木兮山之花

御定全唐詩卷四百二十

欽定四庫全書薈要卷一萬七千八百二十六

集部

御定全唐詩卷四百二十一

元稹

村花晚

庚寅

三春已暮桃李傷棠梨花白蔓菁黃村中女兒爭摘將
插刺頭鬢相誇張田翁蠶老迷臭香曬暴敝敝熏衣裳
非無後秀與孤芳奈爾千株萬頃之茫茫天公此意何
可量長教爾輩時節長

紫躑躅

紫躑躅滅紫櫬裙倚山腹文君新寡乍歸來羞怨春風
不能哭我從相識便相憐但是花叢不迴目去年春別
湘水頭今年夏見青山曲青山驛名迢迢遠在青山上山高
水濶難容足願為朝日早相暎願作輕風暗相觸爾躑
躅我向通州爾幽獨可憐今夜宿青山何年卻向青山
宿山花漸暗月漸明月照空山滿山綠山空月午夜無
人何處知我顏如玉

山枇杷

山枇杷花似牡丹殷潑血往年乘傳過青山正值山花
好時節壓枝凝豔已全開映葉香苞纔半裂緊搏一作縛

紅袖欲支頤慢解絳囊初破結金線叢飄繁蘂亂珊瑚
朵重纖莖折因風旋落羣片飛帶日斜看目精熱亞水
依巖半傾側籠雲隱霧多愁絕綠珠語盡身欲投漢武
眼穿神漸滅穠姿秀色人皆愛怨媚羞容我偏別說向
閑人人不聽曾向樂天時一說昨來谷口先相問及到

山前已消歇左降通州十日遲又與幽花一年別山杳
杞爾託深山何太拙天高萬里看不精帝在九重聲不
徹園中杏樹良人醉陌上柳枝年少折因爾幽芳喻昔
賢礧谿冷坐權門咽

樹上烏

癸卯

樹上烏洲中有樹巢若鋪百巢一樹知幾烏一烏不下
三四雛雛又生雛知幾雛老烏未死雛已烏散向人間
何處無攫麀啄卵方可食男女羣強最多力靈蛇萬古

唯一珠豈可枰彈千萬億
吾不會天教爾輩多子孫
告訴天公天不言

琵琶歌

寄管兒兼誨鐵山
此後竝新題樂府

琵琶宮調八十一旋宮
三調彈不出玄宗偏許賀懷智
段師此藝還相匹
自後流傳指撥衰

一作哀

崑崙善才徒

爾為湏聲少得似雷吼
纏去聲弦不敢彈
羊皮人間奇事

會相續但有卞和無有玉
段師弟子數十人
李家管兒稱上足
管兒不作供奉兒
拋在東都雙鬢絲
逢人便請

送杯盞著盡工夫人不知李家兄弟皆愛酒我是酒徒

為密友著作曾邀連夜宿中碾春

一作清

溪華新綠平明

船載管兒行盡日聽彈無限曲曲名無限知者鮮霓裳

羽衣偏宛轉涼州大偏最豪嘈六么散序多寵撚我聞

此曲深賞奇賞著奇處驚管兒管兒為我雙淚垂自彈

此曲長自

一作長

悲淚垂捍撥朱弦濕冰泉鳴咽流鶯澀

因茲彈作雨霖鈴風雨蕭條鬼神泣一彈既罷又一彈

珠幢夜靜風珊珊低回慢弄關山思坐對燕然秋月寒

月寒一聲深殿磬驟彈曲破音繁併百萬金鈴旋

去聲玉

盤醉客滿船皆暫醒自茲聽後六七年管兒在洛我朝
天游想慈恩杏園裏夢寐仁風花樹前去年御史留東
臺公私感促顏不開今春制獄正撩亂晝夜推囚心似
灰暫輟歸時尋著作著作南園花坼萼臙脂耀眼桃正
紅雪片滿溪梅已落是夕青春值三五花枝向月雲含
吐著作施罇命管兒管兒久別今方覩管兒還為彈六
么六么依舊聲迢迢猿鳴雪岫來三峽鶴唳晴空聞九

霄逡巡彈得六么徹霜刀破竹無殘節幽關鷗軋胡雁
悲斷弦砧騷層冰裂我為含悽歎奇絕許作長歌始終
說藝奇思寡塵事多許來寒暑又經過如今左降在閒
處始為管兒歌此歌歌此歌寄管兒管兒管兒憂爾衰
爾衰之後繼者誰繼之無乃在鐵山鐵山已近曹穆間
二善性靈甚好功猶淺急處未得臻幽閒努力鐵山勤
才姓學取莫遣後來無所祖

小胡笳引

桂府王推官出蜀匠雷氏金徽琴請姜宣彈

雷氏金徽琴王君寶重輕千金三峽流中將得來明窗
拂席幽匣開朱弦宛轉盤鳳足驟擊數聲風雨迴哀笳
慢指董家本姜生得之妙思忖泛徽胡雁咽蕭蕭繞指
轆轤圓袞袞吞恨絨情乍輕激故國關山心歷歷潺湲
疑是雁鷗鷺若騁如聞發鳴鏑流宮變徵漸幽咽別鶴
欲飛猿欲絕秋霜滿樹葉辭風寒雛墜地烏啼血哀弦
已罷春恨長恨長何恨懷我鄉我鄉安在長城窟聞君
虜奏心飄忽何時窄袖短貂裘臙脂山下彎明月

去杭州

送王師範

房杜王魏之子孫雖及百代為清門駿骨鳳毛真可貴

岡頭澤底何足論

近世不以勲賢之胄為令族而以岡廬澤李為甲門

去年江上

識君面愛君風貌情已敦與君言語見君性靈府坦蕩

消塵煩自茲心洽跡亦洽居常竝榻游竝軒柳陰覆岸

鄭監水李花壓樹韋公園每出新詩共聯綴閑因醉舞

相牽援時尋沙尾楓林夕夜摘蘭叢衣露繁令君別我

欲何去自言遠結迢迢婚簡書五府已再至波濤萬里

酬一言為君再拜贈君語願君靜聽君勿喧君名師範
欲何範君之烈祖遺範存永寧昔在掄鑒表沙汰沈濁
澄浚源君今取友由取士得不別白清與渾昔公事主
盡忠讜雖及死諫誓不諼今君佐藩如佐主得不陳露
訓所恩昔公為善日不足假寐待旦朝至尊令君三十
朝未與得不寸晷倍璵璠昔公令子尚貴主公執舅禮
婦執笄返拜之儀自此絕關雎之化皎不昏君今遠聘
奉明祀得不齊勵親蘋蘩斯言皆為書佩帶然後別被

乃可捫別袂可捫不可解解袂開帆悽別魂魂搖江樹
鳥飛沒帆挂檣竿鳥尾翻翻風駕浪拍何處直指杭州
由上元上元蕭寺基址在杭州潮水霜雪屯潮戶迎潮
擊潮鼓潮平潮退有潮痕得得為題羅剎石古來非獨
伍員冤

南家桃

南家桃樹深紅色日照露光看不得樹小花狂風易吹
一夜風吹滿牆北離人自有經時別眼前落花心歎息

更待明年花滿枝一年迢遞空相憶

志堅師

嵩山老僧披破衲七十八年三十臘靈武朝天遼海征
宇宙曾行三四匝初因怏怏難却頭便繞嵩山寂師塢
淮西未返半年前已見淮西陣雲合

答子蒙

報盧君門外雪紛紛紛紛門外雪城中鼓聲絕強梁御
史人觀步安得夜開沽酒戶

辛夷花

問韓
員外

問君辛夷花君言已斑駁不畏辛夷不爛開顧我筋骸
官束縛縛遣推囚名御史狼藉囚徒滿田地明日不推
緣國忌依前不得花前醉韓員外家好辛夷開時乞取
三兩枝折枝為贈君莫惜縱君不折風亦吹

廳前柏

廳前柏知君曾對羅希奭我本癡狂耽酒人何事與君
為對敵為對敵洛陽城中花赤白花赤白囚漸多花之

赤白奈爾何

夜別筵

夜長酒闌燈花長燈花落地復落牀似我別淚三四行
滴君滿坐之衣裳與君別後淚痕在年年著衣心莫改

三泉驛

三泉驛內逢上巳新葉趨塵花落地勸君滿盞君莫辭
別後無人共君醉洛陽城中無限人貴人自貴貧自貧

何滿子歌

張湖南座為唐有態
作有態一作有熊

何滿能歌能宛轉天寶年中世稱罕嬰刑繫在囹圄間
水調哀音歌憤懣梨園弟子奏玄宗一唱承恩羈網緩
便將何滿為曲名御譜親題樂府纂魚家入內本領絕
葉氏有年聲氣短自外徒煩記得詞點拍纔成已夸誕
我來湖外拜君侯正值灰飛仲春瑄廣宴江亭為我開
紅妝逼坐花枝暖此時有態蹋華筵未吐芳詞貌夷坦
翠蛾轉盼搖雀釵碧袖歌垂翻鶴卵定面凝眸一聲發
雲停塵下何勞算迢迢擊磬遠玲玲一一貫珠勻款款

犯羽含商移調態留情度意拋弦管湘妃寶瑟水上来

秦女玉簫空外滿纏絲疊破最慙慙整頓衣裳頗

一作事

閒散冰含遠溜咽還通鶯泥晚花啼漸嬾斂黛吞聲若
自冤鄭袖見捐西子浣陰山鳴雁曉斷行巫峽哀猿夜
呼伴古者諸侯饗外賓鹿鳴三奏陳圭瓚何如有態一
曲終牙籌記令紅螺盃

一作盃

通州丁溪館夜別李景信三首

月濛濛兮山掩掩束束別魂眉斂斂蠡琖覆時天欲明

碧幌青燈風濫濫淚消語盡還暫眠唯夢千山萬山險
水環環芳山簇簇啼鳥聲聲婦人哭離牀別臉睡還開
燈地暗飄珠蔌蔌山深虎橫館無門夜集巴兒扣空木
雨蕭蕭芳鵲咽咽傾冠倒枕燈臨滅倦僮呼喚應復眠
啼雞拍翅三聲絕握手相看其奈何奈何其奈天明別
酬鄭從事四年九月宴望海亭次用舊韻

海亭樹木何龍蔥寒光透坼秋玲瓏湖山四面爭氣色
曠望不與人間同一拳填伏東武小

龜山別名

兩山鬬構秦

望雄

兩峰為秦望
望秦二山

嵌空古墓失文種

墓在州城西山
上圖經湖水到山迎

棺柩入海今
所存古穴耳

突兀怪石疑防風舟船駢比

毗必反

有宗侶

水雲滂泐無始終雪花布徧稻隴白日脚插入秋波紅

興餘望劇酒四坐歌聲舞豔煙霞中酒酣從事歌送我

歌云此樂難再逢良時年少猶健美使君況是白頭翁

我聞此曲深歎息唧唧不異秋草蟲憶年十五學構廈

有意蓋覆天下窮安知四十虛富貴朱紫束縛心志空

妝梳伎女上樓榭止欲歡樂微茫躬雖無趣尚慕賢聖

幸有心目知西東欲將滑甘柔藏府已被鬱噎衝喉嚨
君今勸我酒太醉醉語不復能沖融勸君莫學虛富貴
不是賢人難變通

一本富貴不
是賢人通

欽定四庫全書薈要卷一萬七千八百二十七

集部

御定全唐詩卷四百二十二

元稹

夢遊春七十韻

昔歲

一作君

夢遊春夢遊何所遇夢入深洞中果遂平生

趣清泠淺漫流

一作溪

畫舫蘭篙渡過盡萬株桃盤旋竹

林路長廊抱小樓門牖相回互樓下雜花叢叢邊統駕

鷺池光漾霞影

一作彩霞

曉日初明照未敢上階行頻移曲

池步烏龍不作聲碧玉曾相慕漸到簾幕間裴回意猶
懼閑窺東西閣奇玩參差布隔子碧油糊駝鉤紫金鍍
逡巡日漸高影響人將寤鸚鵡饑亂鳴嬌娃睡猶怒簾
開侍兒起見我遙相諭鋪設繡紅茵施張鈿妝具潛褰
翡翠帷瞥見珊瑚樹不辨一作見花貌人空驚香若霧身

回夜合偏態斂晨霞聚睡臉桃破風汗妝蓮委露叢梳
百葉髻金蹙重臺屢紕軟鈿頭裙玲瓏合歡袴鮮妍脂
粉薄閨澹衣裳故最似紅牡丹雨來春欲暮夢魂良易

驚靈境難久寓夜夜望天河無由重沿泝結念心所期
返如禪頓悟覺來八九年不向花迴顧雜合

一作洽

兩京

春喧聞衆禽護我到看花時但作懷仙句浮生轉經歷
道性尤堅固近作夢仙詩亦知勞肺腑一夢何足云良

時事

一作自

婚娶當年二紀初嘉節三星度朝薜玉佩迎

高松女蘿附韋門正全盛出入多歡裕甲第漲清池鳴
騶引朱輅廣榭舞菱甡長筵賓雜厝青春詎幾日華實
潛幽蠹秋月照潘郎空山懷謝傅紅樓嗟壞壁金谷迷



荒戍石壁破闌干門推舊柱雖云覺夢殊同是終難
駐悰緒竟何如棼絲不成絢卓女白頭吟阿嬌金屋賦
重璧盛姬臺青冢明妃墓盡委窮塵骨皆隨流波注幸
有古如今何勞縑比素況余當盛時早歲諧如務詔冉
冠賢良諫垣陳好惡三十再登朝一登還一仆寵榮非
不早遭迴亦云屢直氣在膏肓氛氲日沈痼不言意不
悛悛意言多忤忤誠人所賊性亦天之付乍可沈為香
不能浮作瓠誠為堅所守未為明所措事事身已經營

營計何誤美玉琢文珪良金填武庫徒謂自堅貞安知
受磬鑄長絲羈野馬密網羅陰兔物外各迢迢誰能遠
相錮時來旣若飛禍速當如驚曩意自未精此行何所
訴努力去江陵笑言誰與晤江花縱可憐奈非心所慕
石竹逞妍黠蔓青誇畝數一種薄地生淺深何足妒荷
葉水上生團團水中住瀉水置葉中君看不相污

桐花落

莎草徧桐陰桐花滿莎落蓋覆相團圓可憐無厚薄

歲幽院中深堂下簾幕同在後門前因論花好惡君誇
沈檀樣云是指撫作暗澹滅紫花句連感金夢都繡六
七枝鬪成雙孔雀尾上稠疊花又將金解絡我愛看不
已君煩睡先著我作繡桐詩繫君裙帶著別來苦修道
此意都蕭索今日竟相牽思量偶然錯

夢昔時

閒窗結幽夢此夢誰人知夜半初得處天明臨去時山
川已久隔雲雨兩無期何事來相感又成新別離

恨妝成

曉日穿隙明開帷理妝點傅粉貴重重施朱憐冉冉柔
鬟背額垂叢鬢隨釵斂凝翠暈蛾眉輕紅拂花臉滿頭
行小梳當面施圓靨最恨落花時妝成獨披掩

古決絕詞

乍可為天上牽牛織女星不願為庭前紅槿枝七月七
日一相見相見故心終不移那能朝開暮飛去一任東
西南北吹分不兩相守恨不兩相思對面且如此背面

當可知

一作何如

春風撩亂伯勞語況是此時拋去時

一本無況

是二字

握手苦相問竟不言後期君情既決絕妾意已

一作

亦參差借如死生別安得長苦悲

噫春冰之將泮何予懷之獨結有美一人於焉曠絕一

日不見比一日於三年況三年之曠別水得風兮小而

乙波筍在苞兮高不見節矧桃李之當春競衆人而

一作

之攀折我自顧悠悠而若雲又安能保君皚皚

一作皓皓

之

如雪感破鏡之分明睹淚痕之餘血幸他人之既不我

先又安能使他人之終不我奪已焉哉織女別黃姑一
年一度暫相見彼此隔河何事無

夜夜相抱眠幽懷尚沈結那堪一年事長遣一宵說但
感久相思何暇暫相悅虹橋薄夜成龍駕侵晨列生憎

野鶴性

一作鵠往

遲迴死恨天雞識時節曙色漸瞳瞳

一作曉曉

華星欲

一作次

明滅一去又一年一年何可

一作時

徹有此

迢遞期不如死生別天公隔

一作可一作何

是妒相憐何不便

教相決絕

櫻桃花

櫻桃花一枝兩枝千萬朵
花塼曾立摘花人
窄破羅裙紅似火

曹十九舞綠鈿

急管清弄頻舞衣纔攬結
含情獨搖手
雙袖參差列
騷裊柳牽絲
炫轉風回雪凝眄
嬌不移
往往度繁節

閨晚

紅裙委塼堦
玉爪撈朱橋
素臆光如砒
明瞳豔凝溢
調

弦不成曲學書徒弄筆夜色侵洞房春煙透簾出

曉將別

風露曉淒淒月下西牆西行人帳中起思婦枕前啼
眉命僮御晨裝儼已齊將去復攜手日高方解攜

薔薇架

清水驛

五色階前架一張籠上被殷紅稠疊花半綠鮮明地
風蔓羅帟帶露英蓮臉淚多逢走馬郎可惜簾邊思

月暗

第六句
缺四字

月暗燈殘面牆泣羅縷斗重知啼濕真珠簾斷蝙蝠飛
燕子巢空螢火入深殿門重夜漏嚴柔
年急

君王掌上容一人更有輕身何處立

新秋

旦暮已淒涼離人遠思忙夏衣臨曉薄秋影入檐長前
事風隨扇歸心燕在梁殷勤寄牛女河漢正相望

贈雙文

豔極翻含怨

一作態

憐多轉自嬌有時還暫

一作自

笑閑坐

愛

一作更

無慘曉月行看墮春酥見欲消何因肯垂手不

敢望回腰

舞曲
二名

春別

幽芳本未闌君去蕙花殘河漢秋期遠關山世路難雲
屏留粉絮風幌引香蘭腸斷迴文錦春深獨自看

和樂天示楊瓊

我在江陵少年日知有楊瓊初喚出腰身瘦小歌圓緊
依約年應十六七去年十月過蘇州瓊來拜問郎不識

青衫玉貌何處去安得紅旗遮頭白我語楊瓊瓊莫語
汝雖笑我我笑汝汝今無復小腰身不似江陵時好女
楊瓊為我歌送酒爾憶江陵縣中否江陵王令骨為灰
車來嫁作尚書婦盧戡及第巖澗在其餘死者十八九
我今賀爾亦自多爾得老成余一作亦白首楊瓊本名播少為江陵酒
妓去年姑蘇遇瓊叙舊及今見樂天此篇因走筆追書此曲

魚中素

重疊魚中素幽絨手自開斜紅餘淚蹟知著臉邊來

代九九

昔年桃李月顏色共花宜迴臉蓮初破低蛾柳竝垂望
山多倚樹弄水愛臨池遠被登樓識潛因倒影窺隔林
徒想像上砌轉逶迤謾擲庭中果虛攀牆外枝強持文
玉佩求結麝香縈阿母憐金重親兄要馬騎把將嬌小
女嫁與冶遊兒自隱勤勤索相要事事隨每常同坐臥
不省暫參差纔學羞兼妒何言寵便移青春來易皎白
日誓先虧僻性嗔來見邪行醉後知別牀鋪枕席當面

指瑕疵妾貌應猶在君情遽若斯的成終世恨焉用此
宵為鸞鏡燈前撲鴛衾手下墮參商半夜起琴瑟一聲
離努力新叢豔狂風次第吹

盧十九子蒙吟盧七員外洛川懷古六韻命余
和

聞道盧明府閑行詠洛神浪圓疑靨笑波鬪憶睂頻蹀
躑橋頭馬空濛水上塵草芽猶犯雪冰岸欲消春寓目
終無限通辭未有因子蒙將此曲吟似獨眠人

劉阮妻

一作山

二首

仙洞千年一度開，等閑偷入又偷迴。
桃花飛盡東風起，何處消沈去不來。

芙蓉脂肉綠雲鬟，
畫樓臺青黛山。
千樹桃花萬年藥，
不知何事憶人間。

桃花

桃花淺深處，似勻深淺妝。
春風助腸斷，吹落白衣裳。

莫秋

看著牆西日又沈步廊迴合戟門深栖烏滿樹聲聲絕
小玉上牀鋪夜衾

壓牆花

野性大都迷里巷愛將高樹記人家春來偏認平陽宅
為見牆頭拂面花

舞腰

裙裾旋旋手迢迢不趁音聲自趁嬌未必諸郎知曲誤
一時偷眼為迴腰

白衣裳二首

雨濕輕塵隔院香
玉人初著白衣裳
半含惆悵閒看繡
一朵梨花壓象牀

藕絲衫子柳花裙
空著沈香慢火熏
閑倚屏風笑周昉
枉拋心力畫朝雲

憶事

夜深閑到戟門邊
却繞行廊又獨眠
明月滿庭池水綠

桐花垂在翠

一作繡

簾前

寄舊詩與薛濤因成長句

詩篇調態人皆有細膩風光我獨知
月夜詠花憐暗澹雨朝題柳為教垂
長教碧玉藏深處總向紅牋寫自隨
老大不能收拾得與君閑似好男兒

友封體

雨送浮涼夏簟清小樓腰褥怕單輕
微風暗度香囊轉朧月斜穿隔子明
樺燭燄高黃耳吠柳堤風靜紫騮聲
頻頻聞動中門鎖桃葉知嗔未敢迎

看花

努力少年求好官
好花須是少年看
看君看老大逢花樹
未折一枝心已闌

斑竹

得之
湘流

一枝斑竹渡湘沅
萬里行人感別魂
知是娥皇廟前物
遠隨風雨送啼痕

箏

莫愁私地愛王昌
夜夜箏聲怨隔牆
火鳳有凰求不得

春鶯無伴囀空長急揮舞破催飛燕慢逐歌詞弄小娘
死恨相如新索婦枉將心力為他狂

春曉

半欲天明半未明醉聞花氣睡聞鶯
狂兒撼起鐘聲動
二十年前曉寺情

所思二首

一作劉禹錫詩
題作有所嗟

庾亮樓中初見時武昌春柳似腰肢
相逢相失還如夢
為雨為雲今不知

鄂渚濛濛煙雨微
女郎魂逐暮雲歸
只應長在漢陽渡
化作鴛鴦一隻飛

鶯鶯詩

一作離思
詩之首篇

殷紅淺碧舊衣裳
取次梳頭闌澹妝
夜合帶煙籠曉日
牡丹經雨泣殘陽
低迷隱

一作依稀
相似

笑原非笑散漫清

一作

彷彿

香不似

一作是

香頻動橫波嗔阿母

一作嬌
不語

等閑教

見小兒郎

離思五首

一本并前
首作六首

自愛殘妝曉鏡中環釵謾篆綠絲

一作雲

叢須臾日射燕

脂頰一朵紅蘇旋欲

一作融玉

山泉散漫繞階流萬樹桃花映小樓閑讀道書慵未起
水晶簾下看梳頭

紅羅著壓逐時新吉了

一作杏子

花紗嫩麴塵第一莫嫌材

地弱些些紕繆最宜人

曾經滄海難為水除却巫山不是雲取次花叢嬾迴顧
半緣修道半緣君

尋常百種花齊發，偏摘梨花與白人。今日江頭兩三樹，

可憐和

一作枝

葉度殘春

雜憶五首

今年寒食月無光，夜色纔侵已上牀。憶得雙文通內裏，

玉櫳深處暗聞香。

花籠微月竹籠煙，百尺

一作丈

絲繩拂地懸。憶得雙文人

靜後，潛教桃葉送鞦韆。

寒輕夜淺繞回廊，不辨花叢暗辨香。憶得雙文隴月下，

小樓前後捉迷藏

山榴似火葉相兼
亞拂塼階

一作低牆

半拂檐
憶得雙文獨

披掩滿頭花草倚新簾

春冰消盡碧波湖
漾影殘霞似有無
憶得雙文衫子薄

一作裏

鈿頭雲映褪紅酥

一作蘇

有所教

莫畫長眉畫短眉
斜紅傷豎莫傷垂
人人總解爭時勢
都大須看各自宜

襄陽為盧竇紀事

帝下真符召玉真
偶逢遊女暫相親
素書三卷留為贈
從向人間說向人

風弄花枝月照階
醉和春睡倚香懷
依稀似覺雙環動
潛被蕭郎却玉釵

鶯聲撩亂曙燈殘
暗覓金釵動曉寒
猶帶春醒嬾相送
櫻桃花下隔簾看

琉璃波面月籠煙
暫逐蕭郎走上天
今日歸時最腸斷

回江還是夜來船

花枝臨水復臨堤，閑照江流

一作清江

亦照泥千萬。春風好

擡舉夜來曾有鳳皇栖

此首一作馬戴詩題作襄陽席上呈于司空

會真詩三十韻

微月透簾櫳，螢光度碧空。遙天初縹緲，低樹漸蔥蘢。
龍吹過庭竹，鸞歌拂井桐。羅綃垂薄霧，環佩響輕風。
絳節隨金母，雲心捧玉童。更深人悄悄，晨會雨濛濛。
珠瑩光文履，花明隱繡櫳。寶釵行彩鳳，羅帔掩丹虹。
言自瑤華

浦將朝碧帝宮因遊李

一作洛

城北偶向宋家東戲調初

微拒柔情已暗通低鬟蟬影動迴步玉塵蒙轉面流花

雪登牀抱綺叢鴛鴦交頸舞翡翠合歡籠睂黛羞頻聚

朱脣暖更融氣清蘭蕖馥膚潤玉肌豐無力慵移腕多

嬌愛斂躬汗光珠點點髮亂綠鬆鬆方喜千年會俄聞

五夜窮留連時有限繾綣意難終慢臉含愁態芳詞誓

素衷贈環明運合留結表心同啼粉流清鏡殘燈繞暗

蟲華光猶冉冉旭日漸瞳瞳警乘

一作乘鶴

還歸洛吹簫亦

上一作止

嵩衣香猶染麝枕膩尚殘紅
暮暮臨塘草飄飄

思渚

一作緒

蓬素琴鳴怨鶴清溪望歸鴻
海闊誠難度天

高不易沖行雲無處所
蕭史在樓中

古豔詩二首

一作春詞

春來頻到宋家東
垂袖開懷待好風
鶯藏柳閣無人語
惟有牆花滿樹紅

深院無人草樹光
嬌鶯不語趁陰藏
等閑弄水浮花片
流出門前賺阮郎

一作流

御定全唐詩卷四百二十二

欽定四庫全書薈要卷一萬七千八百二十八

集部

御定全唐詩卷四百二十三

元稹

奉和浙西大夫李德裕述夢四十韻大夫本題
言贈於夢中詩賦以寄一二僚友故今所和者

亦止述翰苑舊游而已次本韻

第十七句
缺一字

聞有池塘什還因夢寐遭攀禾工類蔡詠豆敏過曹莊
蝶玄言祕羅禽藻思高

本篇稱六句皆夢中作
三聯亦多徵故事也

戈矛排

筆陣貔虎讓文韜綵繡鸞凰頸權奇驥騄髦神樞千里

應華袞一言褒李廣留飛箭王祥得佩刀傳乘司隸馬

繼染翰林毫辨穎超脫詞鋒豈足索金剛錐透玉鑰

鐵劒吹毛

自戈矛而下皆述大夫刀筆瞻盛文藻秀麗翰苑謨猷綸誥褒貶功多名將人許三公世

總臺綱充學士等矣

顧我曾陪附思君正鬱陶近酬新樂錄仍寄

續離騷

近蒙大夫寄簪策歌酬和才畢此篇續至

阿閣偏隨鳳

大夫與稭偏多同直

方

壺共跨鰲借騎銀杏葉

學士初入例借飛龍馬

橫賜錦垂荀

解已具本

篇冰井分珍果金瓶貯御醪獨辭珠有戒廉取玉非叨

麥紙侵紅點

書詔皆用
麥紋紙

蘭燈燄碧高

麻制例皆
通宵勘寫

代予言

不易承聖旨偏勞

積與大夫相代
為翰林承旨

繞月同棲鵲驚風比

夜爇吏傳開鎖契

學士院密通銀臺每早常聞
門使勘契開鎖聲甚煩多

神撼引

鈴條

院有懸鈴以備夜直警急文書出入皆引之以代
傳呼每用兵鈴輒有聲如人引聲耗緩急具如之

曾莫
之差

渥澤深難報危心過自操犯顏誠懇懇騰口懼忉

忉佩寵雖綢綬安貧尚葛袍賓親多謝絕延薦必英豪

自阿閣而下皆言積同在翰林日居處深
祕與頻繁奉職勤勞畏慎周密等事也

分阻杯盤會

閒隨寺觀遨

學士無過從聚會之例大夫與
積時時期於寺觀閒行而已矣

祇園一林

杏慈恩仙洞萬株桃

都玄

澥海滄波滅昆明劫火熬未陪登

鶴駕已訃墮烏號痛淚過江浪冤聲出海濤尚看恩詔

濕已夢壽宮牢

本篇言此兩句是夢中作故言夢字

再造承天寶新持濟

巨篙猶憐獎簪履重委舊旌旄

渤海已下皆言舉感先恩捧荷新澤等事

北

望心彌苦西回首屢搔九霄難就日兩浙僅容舫暮竹

寒窗影衰楊古郡濠魚鰕集橘市鶴鶴起亭臯

越州宅窗戶間

盡見城郭

朽刃休衝斗

謂自良弓枉在弦

竊論

早彎摧虎兕便鑄

壑蓬蒿漁艇宜孤棹樓船稱萬艘量材分用處終不學

滔滔

自述

一作王建宮詞

延英引對碧衣郎
江硯宣毫各別牀
天子下簾親考試
宮人手裏過茶湯

春分投簡陽明洞天作

中分春一半今日半春徂
老惜光陰甚慵牽興緒孤偶
成投祕簡聊得泛平湖
郡邑移仙界山川展畫圖
旌旗遮嶼浦士女滿閨閣
似木吳兒勁如花越女姝
牛儂驚

力直蠶妾笑睚眦怪我攜章甫嘲人託鷓鴣閭閻隨地
勝風俗與華殊跣足沿流婦了頭避役奴雕題雖少有
雞卜尚多巫鄉味尤珍蛤家神愛事烏舟船通海嶠田
種繞城隅櫛比千艘合袈裟萬頃鋪烹茶聞小市漁父
隔深蘆日脚斜穿浪雲根遠曳蒲凝風花氣度新雨草
芽蘇粉壞梅辭萼紅含杏綴珠薺餘秧漸長燒後葑猶
枯綠綖高懸柳青錢密繡榆隰鷗眠淺瀨驚雉避平蕪
水靜王餘見山空謝豹呼燕狂捎蛺蝶螟挂集蒲蘆淺

碧鶴新卵深黃鵝嫩雛邛扉以白板寺壁耀蘋湖禹廟
纔離郭陳莊恰半途石帆何峭嶢龍瑞本縈紆穴為探
符圻潭因失箭刻隄形彎熨斗峰勢踴香爐幢蓋迎三
洞煙霞貯一壺桃枝蟠復直桑樹亞還扶鼈解稱從事
松堪作大夫榮光飄殿閣虛籟合笙竽庭狎仙翁鹿池
游縣令鳬君心除健美扣寂入虛無岡跼翻星紀章飛
動帝樞東皇提白日北斗下玄都騎吏羣皆紫科車憶
盡朱地侯鞭社伯海若跨天吳霧噴雷公怒煙揚竈鬼

趨投壺憐玉女喫飯笑麻姑果實經千歲衣裳重六銖
瓊杯傳素液金七進雕胡掌裏承來露拌中釣得鱸苗
生悲局促柯爛覺須臾稊米休言聖醯雞益伏愚鼓鼙
催暝色簪組縛微軀遂別真徒侶還來世路衢題詩歎
城郭揮手謝妻孥幸有桃源近全家肯去無

春遊

酒戶年年減山行漸漸難欲終心懶慢轉恐興闌散鏡
水波猶冷稽峰雪尚殘不能辜物色乍可怯春寒遠目

傷千里新年思萬端無人知此意閑凭小欄干

除夜酬樂天

引儺綏旆亂毵毵戲罷人歸思不堪虛漲火塵龜浦北
無由阿傘鳳城南休官期限元同約除夜情懷老共諧
莫道明朝始添歲今年春在歲前三

酬樂天初冬早寒見寄

乍起衣猶冷微吟帽半敝霜凝南屋瓦雞唱後園枝洛
水碧雲曉吳宮黃葉時兩傳千里意書札不如詩

酬白樂天杏花園

劉郎不用閑惆悵且作花間共醉人算得

一作屈指

貞元舊

朝士幾人

一作員

同見太和春

過東都別樂天二首

樂天在洛太和中積拜左丞自越過洛以二詩別樂

天未幾死於鄂樂天哭之曰始以詩交終以詩訣茲筆相絕其今日乎見紀事

君應怪我留連久我欲與君辭別難白頭徒侶漸稀少

明日恐君無此歡

自識君來三度別這回白盡老髭鬚戀君不去君須會

知得後迴相見無

逢白公

遠路事無限相逢唯一言
月色照榮辱長安千萬門

酬白太傅

太空秋色涼獨鳥下微陽
三徑池塘靜六街車馬忙
漸能高酒戶始是入詩狂
官冷且無事追陪慎莫忘

和嚴給事聞唐昌觀玉蕊花下有遊仙

一作玉蕊院真

人降見唐
人絕句

弄玉潛過玉樹時不教青鳥出花枝的應未有諸人覺
只是嚴郎不得知

贈毛仙翁

并序

余廉問浙東歲毛仙翁惠然來顧越之人士識之
者相與言曰仙翁嘗與葉法善吳筠遊於稽山迨
茲多歷年所而風貌愈少蓋神仙者也余因得執
弟子之禮師其道焉余嘗見圓冠方領之士讀道
書疑其絕知棄仁又謂其書不足以經世理國殊

不知至仁無兼愛大智無非裁大樂同天地之和
大禮同天地之節其可臻乎上德冥乎大道之致
華胥終北之化熙熙然也又以徐市文成之事謂
方士之流誕妄於世不足以為教也殊不知峒山
高臥汾水凝神縱心傲世邈然外物王侯不可得
師友也若然則徐氏之莠不足以害嘉穀文成之
誕不足以傷大教今我仙翁真風遺骨玄格高情
冥鴻孤鶴不可方喻蓋峒山汾水之儔也一言道

合止于山亭三日而南棲天台謂余曰入相之年
相候于安山里余拜而言曰果如仙約燃香拂榻
以俟雲駕焉抒詩一章以為他日之志也

仙駕初從蓬海來相逢又說向天台一言親授希微訣
三夕同傾沆瀣杯此日臨風飄羽衛他年嘉約指鹽梅
花前揮手迢遙去目斷霓旌不可陪

八月十四日夜玩月

猶欠一宵輪未滿紫霞紅襯碧雲端誰能喚得姮娥下

引向堂前子細看

寒食夜

紅染桃花雪壓梨玲瓏雞子鬪羸時今年不是明寒食
暗地鞦韆別有期

三月三十日程氏館餞杜十四歸京

江春今日盡程館祖筵開我正南冠繫君尋北路回謀
身誠太拙從宦苦無媒處困方明命遭時不在才踰年
長倚玉連夜共銜杯涸溜霑濡沫餘光照死灰行看鴻

欲翫敢憚酒相催
拍逐飛觥絕香隨
舞袖來消梨拋五
徧娑葛殢三臺已
許尊前倒臨風淚
莫顏

酬張祕書因寄馬贈詩

丞相功高厭武名
牽將戰馬寄儒生
四蹄荀距藏雖盡
六尺鬚頭見尚驚
減粟偷兒憎未飽
騎驢詩客罵先行
勸君還却司空著
莫遣衙叅傍子城

戲酬副使中丞

寶鞏

見示四韻

莫恨暫縶鞿交游
幾箇全眼明相見
日肺病欲秋天五

馬虛盈櫪雙蛾浪滿船可憐俱老大無處用閑錢

贈柔之

窮冬到鄉國正歲別京華自恨風塵眼常看遠地花
碧幢還照曜紅粉莫咨嗟嫁得浮雲壻相隨即是家

修龜山魚池示衆僧

勸爾諸僧好護持不須垂釣引青絲雲山莫厭看經坐
便是浮生得道時

寄贈薛濤

稭聞西蜀薛濤有辭辯及為監察使蜀
以御史推鞠難得見焉嚴司空潛知其

意每遣薛往汨登
翰林以詩寄之

錦江滑膩蛾眉秀幻出文君與薛濤言語巧偷鸚鵡舌
文章分得鳳皇毛紛紛辭客多停筆箇箇公卿欲夢刀
別後相思隔煙水菖蒲花發五雲高

贈劉採春

新粧巧樣畫雙蛾謾裏常州透額羅正面偷勻光滑笏
緩行輕踏破紋波言辭雅措風流足舉止低迴秀媚多
更有惱人腸斷處選詞能唱望夫歌

即羅噴
之曲也

醉題東武

役役行人事紛紛碎簿書功夫兩衙盡留滯七年餘病
痛梅天發親情海岸疎因循未歸得不是憶一作戀鱸魚

崔徽歌

崔徽河中府娼也裴敬中以興元幕使蒲州與徽相從累月敬中使還崔以不

得從為恨因而成疾有丘夏善寫人形徽托寫真寄敬中曰崔徽一旦不及畫中人且為郎死

發狂卒

第八句缺

崔徽本不是娼家教歌舞娼家長使君知有不自由
坐在頭時立在掌有客有客名丘夏善寫儀容得恣把

為徽持此謝敬中以死報郎為

一字至七字詩

以題為韻同王起諸公
送白居易分司東郡作

茶

茶香葉嫩芽慕詩客愛僧家碾雕白玉羅織紅紗鉞煎
黃蘗色碗轉麴塵花夜後邀陪明月晨前命對朝霞洗
盡古今人不倦將知醉後豈堪誇

句

兒歌楊柳葉妾拂石榴花

見紀事

松門待制應全遠藥

樹監搜可得知

文昌雜錄云唐宣政殿為正衙殿庭東西有四松松下待制官立班之地舊圖

猶存殿門外有藥樹監察御史監搜之位在此唐制百官入宮殿門必搜監察所掌也至太和元年監搜始停

髻鬟峨峨高一尺門前立地看春風

李娃行見許彥周詩話

御定全唐詩卷四百二十三



總校官庶吉士臣張能照

校對官檢討臣郭寅

謄錄監生臣馬嗣全